



PORTAVÓS VI GOVERNUN KONSTITUSIONÁL



KOMUNIKADU BA MEDIA

Díli, loron 8 fulan-fevereiru tinan 2017

Governu kumpri promesa sira ho infraestrutura

Inaugurasan foun ba Ospital Rejonál Eduardo Ximenes, iha Baukau, no inaugurasan ba edifisiu prinsipál Komisaun Nasionál Eleisaun nian (CNE-sigla iha lia-portugéz), hatudu katak remata ona projetu infraestrutura importante rua ne'ebé presiza hodi apoia servisu esensial sira iha Timor-Leste.

Ospital Rejonál, ne'ebé maka lori naran Vise-Ministru Saúde Governu Unilaterál nian iha tinan 1975, sei serbi ba Munisípiu Baukau no munisípiu viziñu sira hanesan Vikeke, Manatutu no Lautén. Durante serimónia inaugurasan, iha loron 20 fulan-janeiru, Vise-Ministra Saúde, Ana Isabel Soares, hatete katak kontinuasaun ba promesa Governu nian hodi tulun ba servisu sira oin-oin ospital nian, iha área sira prevensaun no tratamentu, terapia no diagnóstiku, internamentu no emerjénsia. Unidade importante Saúde Rejonál ne'ebá nian daudaun ne'e iha funsionáriu sira na'in-227, inklui médiku no espesialista sira na'in-25, enfermeiru sira na'in-98 no parteira sira na'in-22. Elementu hirak ne'e na'in-sanulu-resin-tolu maka membru Brigada Médika Kubana nian.

Inaugura ona mós ofisialmente iha tinan ne'e, edifisiu prinsipál Komisaun Nasionál Eleisaun nian hodi fó espasu ho kondisaun sira ne'ebé maka presiza hodi hala'o servisu importante kona-ba supervizaun, liuliu, kona-ba eleisaun sira oin-mai. Edifisiu ne'e, inaugura ona iha loron 28 fulan-janeiru husi Primeiru-Ministru, Rui Maria de Araújo, Ministru Planeamentu no Investimentu Estratéjiku, Kay Rala Xanana Gusmão, no Prezidente CNE, Alcino Baris, ne'ebé representa investimentu ida iha traballu kontínuu Komisaun nian, atubele kumpri ninia mandatu hodi garante demokrasia iha Timor-Leste, liuhusi promosaun prosesu eleitorál sira livre no justu.

Iha inaugurasan ne'e, Primeiru-Ministru hateten katak instalasaun sira ne'ebé ho kaulidade maka hanesan fatór importante hodi tulun ba institutisaun sira, atubele atinji ninia objetivu sira. No ko'alia mós kona-ba importásia ba rekursu umanu sira organizmu ne'e nian, hodi fó aten-barani ba funsionáriu sira hotu CNE nian hodi hala'o sira nia knaar ho dedikasaun no kontinuasaun iha dezenvolvimentu profesionál.

Portavós Governu Konstitusionál da-VI, Ministru Estadu Agio Pereira, observa ona katak "inaugurasan husi infraestrutura rua ne'e maka nafatin sai nu'udar reflexu ida ba ita-nia progresu. Ospital Rejonál iha Baukau no edifisiu prinsipál Komisaun Nasionál Eleisaun nian iha Díli iha knaar ida importante hodi fornese servisu ho kaulidade ba povu iha Timor-Leste". **REMATA**



Agio Pereira

+670 7723 0011

agio.pereira@cdm.gov.tl

govtlmedia@gmail.com

www.timor-leste.gov.tl